

水陸草木之花可愛者甚蕃晉陶淵明獨愛菊自
李唐來世人甚愛牡丹予獨愛蓮之出淤泥而不
染濯清漣而不妖中通外直不蔓不枝香遠益清
亭亭淨植可遠觀而不可褻翫焉予謂菊花之隱
逸者也牡丹花之富貴者也蓮花之君子者也噫
菊之愛陶後鮮有聞蓮之愛同予者何人牡丹之
愛宜乎衆矣

濂溪愛蓮說

□□□書